

12 SEP 2003

Bajet-Sosial

DR MAHATHIR BIMBANG GEJALA SOSIAL KIAN MENULAR

KUALA LUMPUR, 12 Sept (Bernama) -- Perdana Menteri Datuk Seri Dr Mahathir Mohamad sekali lagi melahirkan kebimbangannya terhadap gejala keruntuhan moral dan peningkatan kes jenayah di kalangan remaja, terutamanya mereka yang masih bersekolah.

Dr Mahathir berkata sebelum ini kejadian pembunuhan yang dilakukan oleh kanak-kanak bawah umur, anak-anak yang lari dari rumah, peras ugut, ponteng dan budaya samseng di kalangan murid sekolah hanya berlaku di luar negara.

"Kalau dahulunya kita hanya melihat kejadian seperti ini berlaku di luar negara melalui televisyen dan akhbar, kini ianya berlaku di depan mata kita sendiri," katanya ketika membentangkan Bajet 2004 di Dewan Rakyat, hari ini.

Dr Mahathir, yang juga Menteri Kewangan berkata gejala itu berlaku disebabkan pengaruh televisyen dan internet yang tidak terkawal yang mencero bohi dan merosakkan pemikiran masyarakat hingga mencemarkan nilai-nilai murni.

Di samping itu, Perdana Menteri turut menegur sikap pengeluar cakera padat video haram yang mengaut keuntungan tanpa menghiraukan kesan buruk ke atas masyarakat.

Katanya, untuk meningkatkan usaha membentaras gejala sosial yang semakin membimbangkan itu, Dasar Sosial Negara telah dilancarkan berasaskan kepada pembangunan sosial yang berteraskan nilai murni dan peningkatan keupayaan insan bagi mencapai perpaduan dan kestabilan sosial.

Perdana Menteri berkata kerajaan juga akan mengambil pendekatan yang lebih bersepadu, strategik dan menyeluruh bagi menangani masalah sosial melalui penubuhan 50 pusat khidmat komuniti di kawasan berisiko tinggi yang mana jenayah dan masalah sosial sering berlaku.

"Kerajaan menyeru agar badan-badan bukan kerajaan (NGO) dan anggota masyarakat setempat menyumbang bersama bagi memastikan dasar ini dapat dilaksanakan dengan jayanya," tambahnya.

Dr Mahathir berkata gejala sosial yang kian membimbangkan perlu dibendung dan diatasi segera, terutamanya di kalangan remaja yang bakal menjadi pemimpin pelapis.

Katanya, usaha untuk membentuk sebuah masyarakat Malaysia yang berakhlak dan bermoral tinggi bukan hanya tanggungjawab kerajaan tetapi mesti ditanggung bersama oleh keluarga dan masyarakat.

-- BERNAMA  
ZMN MFJ MOZ